

# Jumlah pemegang kad kredit muflis meningkat



**Sidang Dewan Rakyat Ke-12**

Oleh WAN FAKHRUL BAKAR,  
ZAINI SAMSU HADI dan ASRON MUSTAPHA

KUALA LUMPUR - Kegagalan menguruskan perbelanjaan secara berhemah menyebabkan bilangan pemegang kad kredit yang muflis akibat hutang berlebihan terus meningkat.

Pada tahun lalu, seramai 1,873 orang dikenakan perintah muflis oleh mahkamah berbanding 1,656 orang pada 2006 dan 1,479 orang (2005) dan 1,397 orang (2004).

Namun kepada Menteri Kewangan Kedua, Tan Sri Nor Mohamed Yacop berkata, hutang kad kredit masih belum mencapai tahap kritikal.

Beliau berkata, sehingga akhir Februari tahun ini, jumlah pinjaman terkumpul kad kredit hanya merangkumi 3.5 peratus daripada jumlah pembiayaan keseluruhan institusi perbankan.

"Daripada jumlah hutang kad kredit sebanyak RM23.3 bilion, 89.3 peratus atau RM20.8 bilion ialah baki semasa, 8.4 peratus atau RM2.0 bilion adalah baki tertunggak tidak melebihi tempoh tiga bulan dan hanya 2.3 peratus atau RM0.5 bilion merupakan baki tertunggak melebihi tempoh tiga bulan atau dikategorikan sebagai tahap pinjaman tak berbayar," katanya.



**MENTERI** Pelajaran, Datuk Seri Hishammuddin Hussein dan timbalannya, Dr. Wee Kah Siong (kanan) berbincang di luar sesi Dewan Rakyat semalam.

Beliau berkata demikian dalam jawapan bertulis kepada pertanyaan Liew Chin Tong (DAP-Bukit Bendera) mengenai jumlah rakyat Malaysia yang muflis akibat penggunaan kad kredit.

Berdasarkan statistik tabiat pembayaran kad kredit bagi tempoh bulan Julai hingga

Disember 2007, beliau berkata, secara puratanya, 30 peratus pemegang kad menyelesaikan jumlah baki sepenuhnya setiap bulan.

Nor Mohamed berkata sepanjang tahun lepas, hanya 2,764,085 permohonan atau 49.7 peratus daripada 5,566,871 permohonan kad kredit telah diluluskan.